

**25N MANIFESTO DO DÍA INTERNACIONAL CONTRA A VIOLENCIA DE XÉNERO
CONCELLO DE MARÍN**

Aprobado polo Pleno Municipal o día 11 de novembro de 2015

“O 25N, Día Internacional contra a Violencia de Xénero, unimos esforzos para elevar a nosa voz contra a barbarie que representa a violencia de xénero no planeta. A ONU reconece a violencia contra as mulleres como unha manifestación das relacións de poder historicamente desiguais entre os sexos que, de feito, impide a igualdade plena das mulleres, sinalando á violencia como un dos mecanismos que mantén a súa situación de subordinación. Segundo datos oficiais, un 75% das mulleres e nenas do mundo son vítimas de violencia física ou sexual no transcurso das súas vidas. En España, a día 30 de setembro están incluídos 51.603 casos de violencia de xénero dentro do Sistema de seguimento integral (VioGén) da Secretaría de Estado do Ministerio do Interior. Son mulleres que denunciaron a súa situación ante as autoridades e dispoñen dunhas medidas de seguimento e protección específicos outorgadas xudicialmente.

Estes casos representan só a punta do iceberg, posto que existen aínda moitos fogares onde a violencia é a forma de comportamento habitual. As mulleres teñen que tomar conciencia da importancia de denunciar a súa situación, as institucións garantir o dereito á privacidade e personalización para facilitar a recepción da denuncia e as autoridades xudiciais asumir a responsabilidade de ditar resolucións penais e civís xustas que amporen á muller e ás fillas e fillos se é o caso, evitando a súa vitimización secundaria e ás graves consecuencias que supón, nalgúns casos, non contar con medidas de protección contra o maltratador.

Debemos ter en consideración que a vía xudicial non é usada por todas as mulleres para saír da súa situación, hai vítimas que son incapaces de denunciar ao seu agresor, pero mediante a axuda médica e psicolóxica, a formación ou a incorporación ao mercado de traballo establecen as claves para rematar coa violencia machista, polo que é imprescindible mellorar e coordinar a resposta institucional de protección, asistencia e apoio ás mulleres que sofren violencia de xénero, incidindo na atención aos menores e ás mulleres especialmente vulnerables vítimas de discriminación múltiple.

As manifestacións da violencia machista avanza ata acadar a máxima crueldade non só a través do asasinato, senón utilizando a nenas e nenos como instrumento de chantaxe e vinganza contra a nai. Nos últimos 10 anos en España, 46 menores de entre tres meses e 16 anos, foron asasinados vilmente polos seus pais, 8 menores no ano 2015. Aínda que foron formuladas as modificacións legais necesarias para recoñecer expresamente como vítimas da violencia de xénero a menores que dependan da muller sobre a que se exerce violencia, temos que esixir que se materialicen estes dereitos na realidade e a xustiza aplique as medidas lexisladas con contundencia, tendo presente o interese superior do menor e a conveniencia de que a súa vida e o seu desenvolvemento teña lugar nun entorno familiar adecuado e libre de violencia. Unha lembranza especial polo tanto, as mulleres, nenas e nenos asasinados este ano no noso país. Para as súas familias o noso apoio incondicional e o noso compromiso de loitar e presionar para que se avance no recoñecemento das realidades da violencia machista e na súa prevención, ata acadar unha sociedade igualitaria.

A educación é clave para previr o terrorismo machista, o sistema educativo ten que garantir o empoderamento das nenas e os nenos para transformar e establecer relacións de xénero baseadas na harmonía, o respecto mutuo e a non violencia.

Este manifesto ten coma obxectivo denunciar de forma contundente os patróns machistas que cosifican e denigran a unha parte da sociedade, as mulleres”.